

粵海關志

粵海關志卷二十

兵衛

臣謹案有明一代懲倭之詐緣海備禦大者爲衛次爲所又次爲巡檢司所在製船日數百料大船日八櫓哨船日風尖快船日高把梢船日十槳飛船凡五等而各港嶼澳又設有水寨營柵統以指揮千百戶鎮撫總以閫職督以憲臣其時廣東一省分爲三路蓋環郡大洋風濤出沒盜賊淵藪故樓船屯哨皆不容緩欽維

聖朝恩覃有截海波不揚固無事明代之補苴張皇  
老師糜餉也然兵可百年不用不可一日無備  
國家於沿海設立汛防專在扶危濟困恭讀

世宗憲皇帝聖訓外洋番估攜資貿易海風飄發不常  
貨船或有覆溺全賴營汛弁兵極力搶救仰見

同瘼在抱衽席斯民二百年來人安物阜而保邦制治  
豫備不虞嘉慶年間於夷商往來總路建鎮遠  
獵德各礮臺又於虎門添設水師提督復酌減  
米艇改造撈繪蓋責效水師守必賴乎礮臺戰

則資乎舟楫苟不講求於平日何以收效於一時我

皇上申命疆臣詰戎禁暴夷船越境懾以兵威稅物走私嚴於緝捕權務邊防固相資爲用矣今輯兵衛凡自內洋迄黃埔凡夷船經由之道之必歸防範者具載營員界址所城礮臺兵額舟艦之數以見軍威之盛而以各營季報附焉

雍正七年七月

聖諭粵東三面距海各省商民及外洋番估攜資置貨

往來貿易者甚多而海風飄發不常貨船或有覆溺全賴營汛弁兵極力搶救使被溺之人得全軀命落水之物不致飄零此國家設立汛防之本意不專在於捕盜賊已也乃沿海不肖之弁兵等利慾薰心貪圖財物每於商船失風之時利其所有乘機搶奪而救人之事姑置不問似此居心行事更甚於盜賊其無恥殘惡已極豈國家弁兵忍爲之事乎如雍正六年八月間有福建龍溪縣人徐榜貿易西洋行至廣東新寧縣地方遭風損船廣海寨守備鄧成同兵丁

等巡哨至彼撈獲銀錢私相分取而坐視徐榜等在  
危困之中不行救護此案現在題報候審又聞有香  
山縣澳門番人月旺貿易交趾於雍正六年十二月  
在瓊州府會同縣遭風損船該汛百總文秀卽駕小  
船般運貨物及至登岸止還本人緞匹銀器數件其  
餘藏匿不吐地方官現在查追似此貪殘不法之事  
廣東福建二省居多而他省沿江濱海之營汛亦所  
不免此皆該地方督撫提鎮等不能化導於平時又  
不能稽查懲究於事後以致不肖弁兵等但有圖財

食利之心而無濟困扶危之念也嗣後若有此等應作何嚴究從重治罪之條使弁兵人等有所畏懼儆戒著沿海督撫各行已見議奏到時九卿會同再行定議此旨頒到之時著一面卽行出示宣諭弁兵等一面定議具奏

乾隆五年

諭東南沿海一帶如山東浙江福建廣東廣西江南等省俱設有戰船以爲海防之備今承平日久官弁漸覺疎忽朕聞船隻數目竟有報部之虛名而十分

之中不無缺少二三者至於大修小補之時每因船數太多難以查覆該防營弁及州縣官員通同作弊將所領帑銀侵蝕入己報修十隻其實不過七八隻而又塗飾顏色以爲美觀仍不堅固且更有不肖官弁令子弟親屬載販外省或貨與商人前往安南日本貿易取利者以朕所聞如此雖未必各省皆然然亦難保必無其事可傳諭該省督撫提鎮等嗣後嚴行稽查加意整頓務令諸弊盡絕以重海防倘將來再有風聞經朕特遣大臣前往查出則虛冒廢弛之



惟於該管之大臣是問

嘉慶五年總督吉慶會奏言虎門海口外沙角山逼近大洋形勢陡削爲洋船必經之路該口雖有橫檔南山二門礮臺但海面遼闊遠至三十餘里礮位轟擊似難得力若於此處建設礮臺與橫檔南山遙相對峙形勢聯絡防禦更爲周密

嘉慶九年二月

聖諭本日御史周廷森條奏各省水師戰船向照部頒

定式祇能在海邊巡查不能放洋遠出請改照商船  
制度以收實用一摺各省水師均設有戰船惟船身  
笨重不便駕駛多有雇用商船出洋堵拏盜匪者且  
該匪等如遇戰船知係官兵緝捕轉得駕舟逃逸是  
以各處出洋緝盜往往用商船暗伏兵丁乘其不備  
以爲掩捕之計今該御史既有此奏亦爲整飭水師  
起見但各省戰船亦難一律紛紛改造前次長麟在  
廣東時曾捐辦米艇數十隻而閩浙兩省近亦倣照  
商船之式改造於巡洋捕盜頗爲得力因思江省濱

海之區近日屢有盜劫之案自應嚴加搜捕所有該處戰船著陳大文卽行倣照廣東閩浙等省之例妥爲籌辦或另製船隻或改造戰船詳議具奏惟是出洋固須船隻便利而尤在兵丁技藝嫻熟方有實濟若水師日漸廢弛卽多設捕盜船隻仍無裨益該督務須專飭各鎮將認真操演以期肅清洋面爲要

是年六月

聖諭孫玉庭奏粵東防剿洋匪情形一摺據稱舟師終年在洋迄無成效從古以來沿海疆論海防而未聞

海戰是以此時以嚴守口岸添駐兵丁爲第一要務等語此論尙屬近理粵東水師廢弛已久紀律全無遂致盜船四出爲患屢有上岸搶劫之事孫玉庭以洋面綿亘三千餘里兵分勢單營員又不得力是以注意防守爲保護村莊之計所奏不爲無見但所謂海防者亦非專事株守竟置舟師於不用粵東官運鹽船及貿易船隻俱由海道行走若無兵船巡護任令盜匪搶劫亦不成事體仍應責成營員於洋面梭織巡查往來緝捕與防兵互相接應設遇近岸之賊

實力捕拏庶盜船畏懼遠颺沿海地方漸臻寧謐

嘉慶十年五月十六日總督那彥成會奏言欽  
奉

聖諭據倭什布延豐奏上年澳門幫同捕盜夷船著那  
彥成延豐卽諭知夷人等以伊等船隻不能得力令  
其速行駕駛回澳嗣後勿得再用夷船幫同捕盜等

因欽此

臣

那彥成檢查案卷上年夷船捕盜

臣

延豐以體制攸關且不能得力於上年十月咨

明倭什布嗣後停止夷船出洋捕盜當經轉飭

夷目遵照在案茲荷

聖明指示仰見

睿慮周詳

臣

等曷勝欽服除飛飭藩臬兩司暨澳門委

員等欽遵

諭旨

卽令該二夷船駕駛回澳嗣後永遠停止出洋捕

盜以示柔懷而昭體制一面飭知沿海文武員

弁並咨明鄰省督

臣

撫

臣

一體轉飭挨查務得

該二船實在下落再行覆奏

嘉慶十一年二月

聖諭粵省濱海地方洋匪充斥緝捕緊要而緝捕尤以船隻爲先從前該省設有米艇較船船尤爲得力嗣因米艇日漸尠舊地方官以修理不貲意存推諉營官則以無船駛駕藉口偷安偶有盜警官兵需船配渡一時猝不及辦輒將商船雇募應用商船無編號可查設被洋匪搶占豈不轉爲賊用甚或肆其竄計轉將搶占船隻作爲商船受雇與官兵駕坐探聽消息皆屬事之所有現在該省實有米艇若干隻是否一律修整足敷駕駛著吳熊光會同孫玉庭查明據

實具奏至水師額兵均係本地民人應募充當果能  
留心遴募凡勇健之徒皆可籍之營伍地方多一精  
銳之兵卽少一獷悍匪徒實爲一舉兩得

是年六月

聖諭朕恭閱

皇考高宗純皇帝實錄恭載乾隆五十五年八月內欽  
奉

諭旨沿海各省設立戰船原以捍禦海疆巡哨洋面關  
係甚重水師兵丁自以試演水務爲急乃該弁兵等



輒稱船身笨重雇用民船其意以民船出海捕盜俱用本船舵水不須兵丁駕駛是以藉詞推諉該弁兵止習馬射槍礮等項而於水師管務轉不留心學習用違所長殊非覈實之道著各督撫等嚴飭舟師實力訓練俾駕駛嫺熟於戰船出入風濤務期帆舵得力各督撫於考拔時令其操駕蓬船泅水出沒留心驗看如果合式方准拔補似此行之日久自能悉臻純熟便於行駛於水師實有裨益仰見我

皇考慎重海疆簡練舟師至意各督撫等如果實力欽

遵則水師兵丁自能嫻習駕駛於出海巡哨又何須  
別資舵工乃近來該弁兵等於操駕事宜全不熟習  
遇放洋之時仍係另行雇募此等舵工技藝高下迥  
殊其雇值亦貴賤懸絕向來各省商船俱不惜重價  
雇募能致力舵工至兵丁等出貲轉雇價值有限  
往往合該兵丁等數名分例亦僅得次等舵工是名  
爲丹師實不諳習水務又豈能責其上緊緝捕乎若  
水師不能操舟卽如馬兵不能乘騎豈非笑談戰船  
出沒風濤呼吸之間一船生命所繫若非操駕得力

有恃無恐焉能追駛如意此於水師捕務關係不淺  
嗣後著沿海各督撫均行通飭所管舟師勒期訓練  
務令弁兵等於轉帆捩舵折戢駕駛及泅水出沒各  
技藝人人嫻習擇其最優者派令充當舵工專管操  
駕如果超眾得力以一兵而收數兵之效念其所得  
分例有限又何妨卽以把總超拔優給糧餉倘能屢  
次出洋加倍勤奮於本船緝捕有效並著該督撫據  
實奏聞自必隨時施恩升擢如此明示獎勵則水師  
弁兵豈不人人踴躍奮勉爭先更可收得人之效該

督撫等務當實力奉行酌量妥辦具奉以期水師營  
伍日有起色綏靖海洋

嘉慶十四年四月二十日總督百齡會同奏言  
查澳門距廣州府屬之香山縣城一百四十五  
里東西南三面枕海惟北面陸路可通縣城向  
來西洋夷人在澳門設有礮臺六座係該夷自  
行居守由縣至澳西路曲折至前山寨地勢開  
展建有土城居民稠密其寨外左右河路均與  
環海之海面相通迤南有沙脊一道名曰蓮莖

向有關閘一座障以石垣設門以通行旅其關  
閘外三里餘卽係入澳之三巴門規其水陸險  
要形制天成以前山寨而控澳門實有拊脊扼  
吭之勢舊設同知一員管轄海防營把總二員  
水師防兵九十名又由香山協派都司千總各  
一員兵丁七十九名駐札協守嗣因香山協副  
將頻年出海緝捕厯任都司調赴縣城經理營  
務遂致前山衙署全行傾圯卽關閘亦僅派兵  
二十八名在彼巡查地要兵單殊非慎重邊防

之道必須設立專管內護香山外控夷澳始足以壯聲威而昭體制應請改遊擊一員中軍守備一員水師千總一員把總二員外委二員額外外委二員招募兵馬步戰守四百名分左右二哨作爲前山營其遊擊守備駐劄寨城鎮守均改爲陸路題缺派撥把總一員帶兵六十名專防關閘汛地外委一員帶兵二十名協防關閘外里許之望厦村並將同知舊管之兵丁九十名再新兵十名交水師千總督率外委一員

管帶駕坐槳船在澳門之東西南三處海面往來巡查統歸遊擊管轄就近隸左翼鎮兼轄庶幾規模整肅鈴束分明於邊防益昭嚴密所有新設前山營遊擊守備各一員查有潮州平鎮營之遊擊守備堪以移駐其千總一員請於撫標右營移撥把總二員請將原所設之海防營把總撥歸外委二員請於督標中營移撥額外委二員俟招募新兵操演純熟卽於本營拔補至平鎮營原設遊擊擬以三水營都司改駐

其三水營都司原缺擬以潮州城守營守備改駐該二營事務較簡量爲改撥均足以資彈壓如此一轉移間俸餉各仍其舊而於營制亦不至窒閔矣

嘉慶十四年六月

聖諭百齡等奏查明登花船難於購料成造仍請添設米艇以期迅速竣工俾資緝捕一摺粵洋勦捕匪船米艇具有成效前此吳熊光忽以米艇不能遠出外洋請改造登花戰船二十號往來外洋緝捕將米艇



全行收入內洋防守現經百齡等查明此項船隻所  
需桅柁大料因須在外番購覓是以二年以來未能  
購得且此時卽購料成造一經風浪掣損將來亦無  
料換修仍屬不能應用况粵洋綿亘四千餘里止仗  
此二十隻之力在外洋策應捕盜寧不顧此遺彼此  
皆吳熊光全無主見不過逞其臆度之詞妄思更改  
而於空言陳奏之外仍無實際斷不可行百齡等現  
已估計船身價值計其一船所需足造米艇兩隻請  
將原估登花船二十隻工料銀十五萬四千餘兩改

設大中小米艇四十號以期節浮糜而便駕駛所議甚是著卽照所奏辦理至目下粵洋緝捕緊要而水陸營伍均屬廢弛該督等務當振刷精神實力整頓以期設一兵得一兵之力添一船得一船之用方爲不負委任

是年又奏言查虎門爲省城中路門戶不但夷貨各船均由此進卽盜艘亦多往來窺伺實爲第一要隘現在該處各島嶼設有三門沙角大橫檔小橫檔等處礮臺均屬扼要惟距虎門東

南十餘里之亭步汎左首新涌山俯臨海汊距  
各礮臺稍遠不能聯絡臣等與護提臣左翼鎮

孫全謀再三籌議應請於新涌口添建礮臺一  
座以資守禦現據該處士民具呈捐出山麓自  
置窩屋田畝以爲建臺基址照式建築安設礮  
械由左翼鎮派千總一員帶兵五十名按季輪  
班駐防其舊設亭步汎卽請裁汰

嘉慶十九年總督蔣攸銑奏言東莞縣虎門海  
口爲夷商出入門戶該處橫嶺南山設立兩礮

臺均有弁兵駐守惟緣海道日久變遷遂致今昔情形各別查虎門之橫檔小山與南山對峙海中凡外洋進口之船必由兩山中流駛入從前該處海道水深兩臺東西相對可以轟擊防堵頗爲得力近則南山脚下沙淤約二十里船由沙外至南山西北角入口舊礮臺勢難控制而南山西北角正與橫檔緊對擬於西北角山坡添建礮臺一座其橫檔礮臺原建地勢較高從上臨下施放礮力不得勢擬於原礮臺東面

城脚增築月牆一道約長八十丈將礮位移於月牆內架放與南山西北角新礮臺及舊礮臺形如品字對船夾擊足以嚴關隘而壯捍衛一應弁兵礮械悉照原額毋庸另議奉部咨准所有新建礮臺名爲鎮遠礮臺

嘉慶二十年總督蔣攸銑奏言粵東海面遼闊港汊紛歧先於嘉慶十五年大幫洋匪平靖之後經前督臣百齡奏准酌留米艇及投誠船額設大中小號米艇一百四十隻分配各營常川

巡緝並經議定各船大小修年限及需用工料  
銀數造冊咨部在案茲據水師提督臣童鎮陞  
往來洋面體察情形所有大號米艇仍應照舊  
派巡以期有備無患其中小之船駁駛折戩不  
甚得力應量爲裁改以期實用而節糜費臣等  
伏查粵東洋面寧謐而內洋以及沿海港口間  
有奸漁窮蛋乘間爲匪亟須隨時偵緝庶不致  
萌蘖復滋其米艇原係在於外洋聯幫緝捕攻  
擊盜船至若淺水處所駕駛不靈自應量爲變

通俾外海內洋均收實效查米艇一項從前亦  
係照民船成造今查有撈船一項係漁民聚  
族而居出海採捕之船無論外洋淺水沿海港  
口均能駕駛足可配兵緝捕較之米艇追逐靈  
便查外海水師各鎮協營兵撥管駕米艇一百  
四十隻另額設緝船彭仔船十九隻內河舫船  
快馬槳巡各船六十二隻今議裁中小米艇二  
十號快馬船九隻內河巡船十五隻仍留米艇  
一百二十號緝船彭仔船十九隻內河槳巡各

船三十八隻並將所裁中小米艇酌改撈船  
三十四隻卽以各案遭風應行補造及拆造未  
經領項之龍門協八號碣石鎮左營三號達濠  
營一號南溪鎮右營五號海門營三號澄海協  
右營二號東山營一號陽江鎮左營七號龍門  
協原編廣字十九號中米艇九隻達濠營二號  
海門營七號澄海協左營五號水師提標右營  
五號崖州營原編南字八號海安營原編碣石  
五號及屆應拆造之平海營第五號龍門協第



十號小米艇八隻共船十七隻陸續裁改撈緝  
船隻以資內洋緝捕至酌改撈緝船隻除將前  
項應改米艇十七隻外尙應裁改三隻俟將來  
遇有應補造拆造中小船隻再行裁改又中號  
米艇拆造每需工料銀三千六百二十兩七錢  
六分零小號米艇拆造每需工料銀二千六百  
七十七兩八錢七分零計拆造中小米艇各十  
隻共需銀六萬二千九百八十六兩三錢八分  
以之勻造撈緝船三十四隻每隻約需工料銀

一千六百餘兩共計可節省六七千兩自造竣之日起仍照米艇章程三年准其小修再三年大修再三年拆造亦歸覈實如有被風等事仍照定例隨時奏請辦理又中米艇每隻遞年原額燂修蓬索銀五十兩又加增燂修銀二十五兩小號每隻遞年原額燂修銀四十兩又加增燂修銀二十兩計中小米艇各十隻共需燂修銀一千三百五十兩今改撈繒船勻算每隻每年應給燂修銀二十八兩又加增銀十四兩統

計酌裁中小米艇二十隻改撈繪船三十四隻  
每年支用經費亦屬相仿奉部咨准行

嘉慶二十二年總督蔣攸銑奏言番禺縣屬獵  
德地方爲各夷赴省往來總路應請於此處設  
立礮臺爲中權扼要請於商捐預備礮臺工料  
項內動支興建礮臺奉部咨准行

是年十二月總督阮元奏言此次徧閱內港外  
海礮臺兵房俱爲得力惟內港大黃滯地方有  
大河一道南通香山東南通黃埔虎門爲商船

之所必經若由大黃潛直抵省城卽可不由東南之獵德是僅建獵德礮臺不足以嚴兩路門戶臣阮元親自相度大黃潛有小石山土名龜岡四面皆水堪以添建礮臺又獅子洋外大虎山係中路外洋進口要道大滬逼近山脚舊建橫檔鎮遠礮臺爲第一層門戶若於大虎山脚添建礮臺一座更成重門之勢詢據文武各員及附近士民衆論僉同現飭司委員勘估查照前督臣蔣攸銑原奏在於商捐本款項下動支

興建奉部咨准行

道光七年六月初二日總督李鴻賓會奏言粵東外海內河奸匪叢集往往結黨同舟晝夜橫行或偷載違禁私貨或強劫商賈財物此等匪類隨處皆有而由黃埔至虎門一帶接近外洋之處爲尤甚雖從前屢經拏辦而其風未嘗少熄所以然者該匪等數十人每共坐一船其船身長而狹兩邊各設木槳數十枝駕駛捷便名曰快蟹艇行走如飛每遇官兵巡船奮力追捕

亦不能及。蓋軍用器械抗拒逃兵而走私者  
稅刼財斃命之害。因以日熾。臣等於上年十月  
間與水師提督臣李增階會同商議籌所以制  
伏之策。因仿照該匪等所坐快蟹艇式樣製造  
應用。爲以毒攻毒之法。長五丈六尺。寬九尺六  
寸。安設木槳四十枝。務期弁兵駕駛足資追捕。  
擬計自黃埔以及虎門外洋面各要隘地方共  
有七處。須造快蟹艇七隻。分設巡查。並以此項  
船隻捕盜則有益。地方緝私則有神。關稅因與

前粵海關監督

臣

達三會同籌議各辦經費共

成此舉毋許開銷庫項迨冬臘間將快船七隻

先後造竣共用造工價銀三千餘兩隨將各船

添備器械均交水師提督

臣

李增增選派精練

弁兵按段實力巡緝自上冬至今凡行劫走私

各匪大半潛蹤即僑聚無幾同一遏逐船即

自棄其艇而逃陸續查獲快蟹艇六隻餘多該

匪自行擊破沉溺深井黃埔虎門一帶河道海

口頗覺肅清辦理不爲無效半年以來每船派

弁一名日給口糧銀六分每船派兵四十名每  
兵日給口糧銀四分皆係臣等與前監督達三  
現任監督文連各半籌給其擊獲船匪之弁丁  
亦皆臣等捐貲給賞至此後每年弁兵口糧及  
修理船隻添備器械一切用費約計一年需銀  
四千兩內外非可常行捐辦亦仍不得動用庫  
款必須籌一經久之策以期支用裕如容俟妥  
爲籌畫再行具奏奉

上諭廣東黃埔至虎門一帶奸匪叢集其船身長而



狹名曰快蟹艇甚至用礮械抗拒運兵經李鴻章  
等會同李增階議籌制伏之策仿照快蟹艇式樣  
造快船七隻分段巡查與粵海關監督籌辦經費  
造裝後交提督選派精兵實力巡緝上年冬間逢  
今該匪一遇巡船卽自棄其艇而遁陸續奪獲快  
蟹艇六隻餘多自行擊沉黃埔虎門海口漸就肅  
清每船派弁一名日給口糧銀六分每船派兵四  
十名每兵日給口糧銀四分俱係該督等捐貲給  
賞所辦甚屬可嘉然必須行之以實持之以久始

於地方有裨此後每年弁兵口糧及修理船隻添補器械一切用費按年約需銀四千兩勢不能常行捐辦亦不得請動庫款自應籌一經久之策以期支用裕如弁兵得資口食出力緝捕不致漸形廢弛著該督等妥爲籌畫俟奏到時再降諭旨該督等惟當認真經理以期永遠遵行毋徒以空言塞責將此通諭知之

道光十四年三月

上諭本日據程祖洛奏言閩省姦民之貿易廣東者

習學番語卽在澳門交接夷人勾引來閩並據現獲之王略供認在澳門生理常與夷人交易稔知夷情凡夷船之帶有鴉片煙土者必先寄泊廣東外洋勾引私船發賣淨盡再收內洋報稅開艙等語現在嚴禁鴉片較前查拏甚緊該夷船不能獲利又素聞內地姦民通信以官兵驅逐夷船不肯用火器轟擊遂致心存藐玩於閩省洋面有不遵驅逐之事轉敢施放鎗礮肆行拒捕向來營員驅逐夷船曾經降旨不准用礮轟擊原期於示威之

中仍寓懷柔之義乃該夷船一遇官船驅逐膽敢  
放施鎗礮且該夷人船隻較大外洋本所熟悉官  
兵駕駛小船洋面未能徧識又復不敢擅用火器  
其應如何防範之處該督撫等務當隨時體察情  
形斟酌妥善以靖洋面而杜私販

道光十四年十一月總督盧坤會奏言查明史  
嘉靖年間有番人佛郎機入香山濠鏡澳爲市  
天啟元年大西洋來中國亦居此澳終明之世  
未嘗爲變卽今之澳夷也該夷人歲輸租銀伍

百兩由縣徵解其建設礮臺六座載在縣志檢  
查舊案西洋人在澳居住以後有紅毛國夷人  
卽今之暎咭喇窺伺澳門常欲脅奪市利西洋  
夷人遂設立夷兵建立礮臺以爲居守之計亦  
係前明時所設嘉慶十三年暎咭喇夷兵擅入  
澳門占據東西礮臺經前督臣吳熊光奏奉

諭旨曉諭退出嗣於十四年署督臣韓對督臣百齡先

後議設前山營官兵案內又將澳夷舊設礮臺  
情形奏明有案本年暎咭喇夷自啤勞啤擅至

省城不遵法度上 盧坤慮其至澳生事並因西  
洋夷人近年貧弱恐爲啖咕喇誘脅密派員升  
在澳門水陸豫爲調度並開導西洋夷人許以  
派撥官兵協守砲臺杜其反側之心密作牽制  
之計亦經奏

聞在案其啖咕喇夷商貿易往來有時領牌赴澳暫  
寓或安頓家眷往來無常卽如本年嘍嘍押  
逐出省以後在澳店戶寄寓旋卽病故其眷屬  
亦已搭船回國是澳夷與啖咕喇並非一氣其

設立礮臺番哨所以防禦噶咭喇諸夷而非噶咭喇之聲援由來已久惟該夷建築礮臺實在年分並無確切志載且該夷如果有凌轢居民蔑視官法及奸夷勾結情事即使章程久定亦必應嚴行驅逐當經委員會同地方文武密訪茲據查得該西洋夷人建設礮臺係在前明天啟年間初造有三巴門伽思蘭娘媽閣三處後因荷蘭爭占又添建東望洋西望洋南灣三處礮臺並將初設礮臺加修寬大添設礮位現在

三巴門礮臺安礮四十七具加思蘭礮臺安礮  
十八具娘媽閣礮臺安礮二十九具東望洋礮  
臺安礮二十具西望洋礮臺安礮十三具南灣  
礮臺安礮五具此外尙有大小礮三十餘位安  
放西洋夷館其礮口自闊八寸至五寸五分不  
等並不能容三人蛇行而入所用火藥均由小  
西洋運來收貯娘媽閣礮臺臨時取用其番哨  
原設四百八十名嗣因經費不足裁汰二百四  
十名又頭目兵總五六十人番哨分守礮臺每



日早晨或鳴鼓換班或開放鳥鎗並非終年訓練佳澳夷人共五百餘家男丁大小一千餘人黑夷奴二百餘人該國派有嚶嚶多一名兵頭番差各一名在澳管理該夷人遇天氣晴明三五人馳馬海旁謂之運氣納涼從無多人遍遊山海之事其各國夷人到澳向西洋人暫時租屋居住並無在澳長住之人現在英咭喇夷商在澳者十九人此外花旗噶嚶西各國自一二三人至七八人不等徧查澳夷並無嗎嚶喊其人

惟查啖咭喇前有夷商嗎哩啞業經病故或係  
傳聽之訛亦未可定以上各情據在澳居住開  
店商民衆口一辭亦與<sub>臣</sub>等平日見聞相符此  
澳夷設立礮臺番哨原委及現在詢訪之實在  
情形也<sub>臣</sub>等復審度地勢體察夷情澳門東西  
南三面濱海其南面係萬山外洋爲各國夷船  
入粵海口北面陸路通香山縣城該夷人所設  
礮臺均在東西南三面望洋而建南面爲獨多  
北面並無礮臺是其設險屯兵專爲防禦外洋

而非意在抗衡內地形制顯然距澳門五里卽  
係前山營所轄之關關汛爲限制澳夷之界該  
處向就河內通海沙脊障以石垣設立一門以  
通行旅派有把總帶兵四十六名防守自關關  
西北十五里卽係前山營從前設立陸路遊擊  
一員守備一員嗣於道光十年將守備移駐大  
鵬右營裁減兵額改遊擊爲內河都司管帶千  
把總外委四員兵丁三百六十三名與海防同  
知駐劄防守臣前赴該營閱兵周覽形勢前山

營控制澳門實有拊脊扼吭之勢關閘咽喉界限尤爲險要天成是澳夷雖有礮臺番哨亦無險可恃而我內地層層扼要控制即使大羊反覆亦不敢肆其玩侮之心又查嘉慶十四年前督<sub>臣</sub>因澳門自伽思蘭礮臺至西望洋礮臺迤南沿海一帶石坎低矮曾爲暎夷爬越奏奉

諭旨令該夷人加築女牆增高培厚俾資防護亦因暎夷築驚恐澳夷力不能禦故爲之固其圉以自保柔澳夷以所貪卽制暎夷以所畏以夷防夷

正與現奉

聖諭先後同揆該夷人久在

皇仁覆幬之中此時如遽行拆毀礮臺驅逐番哨二百餘年久設之藩籬一旦裁撤數百戶澳夷未免轉滋疑懼且使各國夷人以西洋人爲

天朝之所屏棄必致咸生鳩占之心轉非綏靖海隅之道卽以內地海疆而論澳門爲廣東門戶本應建臺設守該礮臺雖建自夷人設遇海防緊要之時內地派員撥兵督同防護未始不得其裨

衛之力臣等公同酌議所有澳門礮臺番哨應  
仍存其舊邀免拆毀驅逐仍嚴加查察不使稍  
有違玩以杜弊端

道光十五年二月二十九日總督盧坤會奏旨  
廣東省城水路東通外洋向在省城東首設立  
礮臺爲防盜禦夷之備惟東礮臺逼近省城其  
距省二十里之獵德礮臺又因河面淤沙不甚  
得勢此時洋面安靜且海口礮臺周密夷船亦  
不足慮惟地處海疆省會重地必應多設屏翰

以壯聲威

臣

盧坤上年與陸路提督曾勝調派

弁兵堵禦倭夷兵船查得省城之東十五里有  
中流沙地方係外海入省必由河道河心漲有  
沙塗正當水路之衝當時卽在彼安礮列兵阻  
遏夷船進出實有扼吭之勢今臣等復與曾勝  
會同詣勘委係中流扼要險阻天成應於此處  
向東建設礮臺派撥弁兵安設礮位凡有外海  
駛入應行堵禦船隻迎面轟擊較東礮臺等處  
之從旁攻擊者更爲著力省城保障無過於此

商之署藩司李思繹暨在省司道均意見相同  
當派廣州府等勘估工料共需銀七千兩零海  
關眾商亦願一律捐辦毋庸動用帑項擬俟虎  
門海口礮臺工竣後卽行興辦庶省城護衛益  
加謹嚴海防更形慎密矣

大鵬營駐廣州府東南五百里東至歸善縣嶺  
凹村陸路三十里西至新安縣楊樹村陸路九  
十五里南至外洋港至歸善縣西鄉凹陸路三  
里分防五汛一鹽田二浣渚礮臺三九龍礮臺



四紅香爐水汛五大嶼山礮臺

水師提標中營駐東莞縣南七十四里虎門寨  
城距省城一百二十里東至新安縣城一百里  
南至香山縣城二百三十里西至順德縣城一  
百十五里分防十汛一鎮遠礮臺二南山礮臺  
三三門卡房四武山五大涌口六大分七閘西  
山八新造九鳳涌十沙角礮臺

水師提標左營駐新安縣城東至大鵬營陸程  
一百三十里西至虎門寨水程一百里西北至

省水程二百八十里南臨海分防五汛一蓮花  
逕二南頭礮臺三茅洲墩臺四屯門五深圳

水師提標右營駐同中營分防五汛一大虎山  
礮臺二橫櫓月臺三獅子塔礮臺四雞公石礮  
臺五蕉門礮臺

香山協左營駐香山縣在廣州府南二百二十  
五里東至新安縣城二百十里西至新會縣城  
三十里南至本營十字門外洋一百七十里北  
至順德縣城九十五里分防四汛一雍陌二平

頂山三磨刀角礮臺四吉大

香山協右營道里四至同左營分防九汛一小  
河洲二黃梁都土城三白鯉沙四新圍五大託  
山礮臺六虎跳門東岸礮臺七小隱八象角九  
萬山東澳礮臺

前山營駐香山縣南一百三十里東至香山協  
左營言大汛十里南至澳門娘媽閣海二十五  
里與香山協左營洋面界西至香山協左營沙  
尾汛六里北至本營南大涌汛十里分防三汛

一望廈二關開三南大涌

右營址

大鵬營

原順德右營遊擊守備千總把總等官康熙四十二年裁順德總兵官將鎮標

右營改爲大鵬營屬提標原設遊擊雍正四年改爲參將駐劄東莞縣大鵬所城隸水師

提督管轄

參將一員

駐劄大鵬所城

謹案左營原大鵬營因管轄大嶼山東涌地

方山勢寬廣查察難周兼商夷船隻經由寄泊之道防範最宜嚴密且距大鵬城四百餘

里實有鞭長莫及之勢於道光十一年將大

鵬營分作左右二營

左營

道光十一年分設左右二營其左營官弁  
惟把總一員裁撥右營餘俱照原額設

守備一員

千總二員

把總三員

右營

道光十一年設駐劄  
新安縣東涌所城

守備一員

道光十一年將前  
山營守備改設

千總一員

道光十一年添設

把總三員

道光十一年添設二員  
原大鴨改練一員

水師提標營

中左右前後五營前後二  
營內河水師餘外海水師

提督一員

中營

嘉慶十五年以左翼鎮  
中營改設駐虎門城

參將一員

嘉慶十五年以海  
口營參將移撥

守備一員

千總二員

把總五員

左營

原左翼鎮標左營嘉慶  
十五年改駐新安縣城

遊擊一員

守備一員

千總二員

把總四員

右營

原左翼鎮右管嘉慶十五年改設駐同中管

遊擊一員

嘉慶十五年以左翼鎮中管遊擊移撥

守備一員

千總三員

把總三員

香山協隸水師提督管轄

副將一員標下左右二營

左營駐劄香山縣城

都司一員

守備一員

千總二員

把總三員

右營駐劄同

都司一員



守備一員

千總二員

把總四員

前山營

原海防營嘉慶十四年改以平鎮管遊擊守備各一員移撥過營原係陸路道

光十一年改為內河水師營駐劄香山縣南一百三十里隸香山協管轄

都司一員

原設遊擊一員守備一員道光十一年改設都司其守備改撥大鵬

管右管

水師千總一員

率外委一員帶兵百名駕坐柴船在澳門東西南三處海

查面巡

把總一員

謹案本營南通澳門與香山協左營洋面交界爲香山一帶門戶緊要之地

右營員

大鵬守禦所城

在新安縣

水師提督轄大鵬管參將駐劄所在縣城東南一百二十里大鵬嶺之麓明洪武二十七年廣州左衛千戶張斌築週圍三百二十五丈六尺高一丈八尺城樓四敵樓四警舖十六雉堞六

百五十門三東西南三面環水濠週圍三百九十八丈

東涌所城

在新安縣

水師提標右營守備駐劄所道光十一年新設

虎門寨城

在東莞縣

水師提標及中營參將守備右營遊擊守備駐

劄所明萬曆十六年始建城虎山前旋移山後

國朝康熙二十六年建今寨於石旗嶺築土爲之週

圍一百八十六丈久之圯五十七年改建磚城

嘉慶十五年添設水師提督駐劄虎門移改總兵副將抽撥兵丁建造衙署兵房以資守禦

前山寨城

在香港山縣

海防同知及水師提督轄香山協副將陸路提督轄廣州協外標前山營遊擊守備駐劄所北距香山縣一百二十里而遙南至澳門十有五里而近明天啟始立寨

國朝康熙二十六年建土城週圍四百七十五丈高九尺每城二十丈增築子城一丈凡二十四丈

爲門三北偏於山故不門起礮臺兵房於西南  
二門之上臺各置礮四位分置城上者六二門  
外復建臺列礮各十雍正八年設縣丞乾隆八  
年以肇慶府同知改設前山寨海防同知而前  
山之勢益重嘉慶十四年設立專營控制澳門  
移平鎮營遊擊守備兼撥千總外委駐劄作爲  
前山營隸左翼鎮管轄十五年因設水師提督  
區分水陸改歸廣州協轄

右所城

順德礮臺嘉慶二十二年建在番禺縣屬廣州  
協左營西關汛距本協二十五里至新塘營沙  
河汛六里下至赤河汛十里

東礮臺在番禺縣屬水師提標後營距營一百  
十三里上至沙河口汛六里下至順德協右營  
西關汛十里

中流沙礮臺道光十六年建在番禺縣屬水師  
提標後營

沱潭山礮臺康熙五十四年建在新安縣屬大

鵬左營在營西水程一百四十里

九龍寨礮臺嘉慶十五年建在新安縣屬大鵬  
左營在營西水程二百九十里

謹案佛堂門原建礮臺一座歸大鵬營管轄  
因年久圯壞該臺孤懸海外無陸可通又無  
村庄居民互相捍衛且距大鵬營縣城二百  
餘里距九龍汛水程四十餘里控制不能得  
力提督錢夢虎議將該臺移建九龍地方兵  
與民合聲勢聯絡守禦較爲得力

大嶼山右衛墩臺嘉慶二十二年建在新安縣屬大鵬右營在本營西水程四百里

謹案新安縣屬大嶼山孤懸海外四面皆水爲各夷船必經之處內惟大澳口東涌口二處可以收泊其東涌口向無汛房惟大澳口額設守兵十三名山上向有雞翼墩臺係大鵬營千總駐守但與東涌大澳相距遙遠不能兼顧嘉慶二十二年總督蔣攸銍阮元准部咨於東涌口建汛房八間又於東涌口御



山脚建礮臺一座兵房七間火藥局一間大  
澳口楊侯廟後建垛牆十丈

赤灣左礮臺在新安縣屬水師提標左營東南  
十里南頭礮臺汎距本營二十里上至赤灣右  
礮臺一里

赤灣右礮臺在新安縣屬水師提標左營東南  
十里南頭礮臺汎距本營十七里上至石園塘  
汎十四里

新涌口礮臺嘉慶十四年建在東莞縣屬水師

提標沙角礮臺汛距本營十二里上至太平汛八里下至左營碧頭汛二十里

沙角礮臺嘉慶五年建在東莞縣屬水師提標中營距本營十一里至三門卡房八里

謹案虎門覽勝云沙角礮臺在木棉洋南面臨大洋勢甚空闊凡閱水操師舟畢集於此惟夷船自龍穴至此則折而西以趨武山雖巨礮僅轟擊其尾無能爲力也然臺甚堅壯以備水閱而威外夷亦設險之要津矣故今

雖改爲望臺仍具載之

威遠礮臺道光十五年建

卽南山礮臺前餘地週圍七十丈

在

東莞縣屬水師提標中營距本營十里下至三門卡房十里

鎮遠礮臺嘉慶十九年建營制同距本營十一里上至武山汛一里下至南山礮臺一里

謹案虎門覽勝云鎮遠礮臺與橫檔礮臺南北對峙相距三百六十餘丈重洋至此爲一大束真天險也蓋自老萬山以內下猶有地

洋面雖極寬闊舟行必由水道以進猶陸路之康莊也外此則或暗沙淤淺或巨石峻嶒夷船載重艙深入水必二丈餘不遵其道非滯於沙卽壞於石矣故諸夷赴黃埔必先於澳門僱雇蛋民之諳於水道者引其舟以行而之引水官爲之司至沙角礮臺呈請報單聲明某國船赴某行貿易乃折而西至兩礮臺間其水道寬不過數丈餘皆巨石相觸不敢行也今夷人之黠者亦畧能知之然自此

至黃埔幾二百里不能處處盡悉建臺於此  
與橫檔礮臺若門之兩扉闔其扉奚自入哉  
橫檔月臺嘉慶十九年建在東莞縣屬水師提  
標右營距本營十二里上至大虎礮臺四里下  
至板頭汛十二里距鎮遠礮臺三百餘丈  
大橫檔礮臺康熙五十六年建

小橫檔礮臺兩臺營制疆里均與月臺同

大虎山礮臺嘉慶二十二年建在東莞縣屬水  
師提標右營距本營十四里上至獅子塔礮臺

二十六里下至橫橋月臺四里

西永安礮臺在東莞縣道光十五年建

週國六十八丈

鞏固礮臺在東莞縣道光十五年建

在蘆溝山週國五十丈

一丈

蕉門礮臺嘉慶十七年建在香山縣屬水師提標右營距本營二十五里上至左口汛十里下至白藤濠汛六里

謹案現蕉門口新礮臺原日建議時係在黃角山建築旋以地非扼要經總督蔣攸銘巡

撫韓封覆勘改建蕉門山嘴腳下逼近獅子  
大洋西靠深山該處孤懸海外人跡罕到搬  
運物料均由獅子洋面經過風濤洶湧運價  
倍增真乃鑿山填海工程浩大十六年二月  
開工至五六月連遭颶風所築圍牆屢被冲  
塌至十七年三月工築始竣

三龜山礮臺康熙五十七年建在香山縣屬香  
山協左營在本營西一百十里

涌口門礮臺康熙五十七年建在香山縣屬香

山協左營距本營四十五里上至右營山蕉坑  
石城環二十里下至平頂山汎十里

磨刀角礮臺在香山縣屬香山協左營在本營  
西四十九里

大託山礮臺雍正十二年建在香山縣屬香山  
協右營在本營南七十五里

虎跳門東礮臺雍正十二年建在香山縣屬香  
山協右營在本營西一百十三里

附澳門西洋夷人礮臺



三巴礮臺

臺冠山板上宿番兵臺垣四周為  
戰處以置守夜者臺下為寢室貯

礮硝六臺中

惟三巴最大

東望洋礮臺

西望洋礮臺

兩臺對峙制  
與三巴同

娘媽閣礮臺

在西望  
洋下

南灣礮臺

南灣澳門紀  
略作南環

伽思蘭礮臺

右礮臺

大鵬營左營



現額弁兵五百零五名

大鵬營右營

現額弁兵四百八十二名

水師提標中營

現額弁兵一千零八十一名

水師提標左營

現額弁兵一千名

水師提標右營

現額弁兵一千一百零一名

香山協左營

現額弁兵八百四十九名

香山協右營

現額弁兵八百四十九名

前山營

現額弁兵三百七十三名

右兵額

大鵬營

左營現額第一第二號大米艇二第三號四號

中米艇二

俱巡查經由新安縣海面定期  
員會哨惟參將總巡本營并專

大嶼山洋面防範夷

船嚴禁毋庸會哨

右營現額第一號大米艇一第二號中米艇一

第三至第五號撈繪船三

俱巡本營洋面  
定期分員會哨

水師提標中左右三營

中營現額第一至第四號大米艇四第五號小

米艇一第六號撈繪船一

上班守備下班參  
將管駕遊巡東莞

新安香山  
等縣洋面

左營現額第一至第三號大米艇三第四第五

號中米艇二第六第七號撈繪船二

上班遊擊  
下班守備

定期出洋遊巡道光十二年令遊  
擊專防大嶼山洋面毋庸會哨

右營現額第一第二號大米艇二第三第四號

中米艇二第五號小米艇一第六號撈繪船

一 上班遊擊下班  
參將定期會哨

額設內河巡船五入額內河巡船五

香山協左右二營

左營現額第一號大米艇一第二至第四號中

米艇三第五號小米艇一第六號撈繪船一

右營現額第一第二號大米艇一第三第四號

中米艇二第五號小米艇一第六號撈船

一副將及左營都司均巡澳門洋面毋庸會

哨期會

額設第一第三第六第九第十號內河巡船五

入額第一第二第七第九至第十二第十四號

內河巡船八

前山營

現額內河槽槳船二

於屬內經管澳門內河  
東西南三處河面往來

巡查併獲押夷船出入口  
岸水陸巡遊向無會哨

右戰巡各船

各營季報

海口營

在瓊  
州府

南墩臺港由澄海協左營守備造報本營參  
將咨送

謹案廣東省各汛港口商船所設水梢人數  
姓名及載運一切出入貨物每歲均由所轄  
各營查驗按季造冊報明大關

龍門場

在狀州

龍門防城永安港口由左右營都司造報本

協副將咨送

碣石鎮

在惠州府

甲子湖東港口由中軍守備造報左營遊擊

三本鎮總兵官咨送

崎石烏墩港口由中軍守備造報中軍遊擊

呈本鎮總兵官咨送

汕尾港口由中軍守備造報右營都司呈本



鎮總兵官咨送

潮州鎮

在潮州府

後溪口由中軍守備造報鎮屬潮陽營遊擊  
咨呈沙汕頭港溪東港由中軍都司左營守  
備造報鎮屬澄海協副將移送

樟林港南洋港東墮港由中軍都司右營守  
備造報鎮屬澄海協副將移送

化石營

在石城縣

汛內港日由左右哨把總造報本管都司呈

繳

海安營

在雷州府

汎內港口由中軍守備造報本營遊擊咨呈

萬州營

在瓊州府

汎內港口由中軍守備造報本營遊擊咨呈

崖州協

在瓊州府

汎內港口由水師守備造報本協副將移送

右各營季報

粵海關志卷二十終